

Durante o antedito prazo poderá examinarse o expediente en horario de nove a dúas, de luns a venres, na Secretaría do Concello.

Carballado, 7 de xuño de 2018.- O Alcalde, Julio M. Yebra-Pimentel Blanco.

R. 1686

CASTRO DE REI

Anuncio

Téndose elevado a definitivo, ó non presentarse reclamacións, o acordo de aprobación provisional da ORDENANZA MUNICIPAL REGULADORA DA OCUPACIÓN DO ESPAZO PÚBLICO PARA A INSTALACIÓN DE TERRAZAS DE HOSTALERÍA, publícase o texto definitivo para a súa vixencia e posible impugnación xudicial, conforme ao previsto nos arts. 49, 65.2 e 70.2 do Lei reguladora das bases de réxime local:

ORDENANZA MUNICIPAL REGULADORA DA OCUPACIÓN DO ESPAZO PÚBLICO PARA A INSTALACIÓN DE TERRAZAS DE HOSTALERÍA

EXPOSICIÓN DE MOTIVOS

A presente ordenanza ven regular, dentro da competencia municipal e ao abeiro do establecido na Lei 7/1985, de bases de réxime local, así como no artigo 77 do Real Decreto 1372/86, de 13 de xuño, polo que se aproba o Regulamento de Bens das Entidades Locais, a instalación de terrazas de hostalaría nos espazos de uso público do Concello de Castro de Rei.

Trátase de buscar un marco normativo que posibilite o desenvolvemento da actividade hostaleira de xeito beneficioso para o seu negocio así como para o ocio e disfrute dos cidadáns, que permita a consideración do espazo público como un espazo de convivencia e disfrute colectivo.

O Concello estudou a creación da presente normativa con respecto ás terrazas de hostalería coa finalidade de unificar a imaxe exterior dos establecementos hostaleiros cun mobiliario que ofrezca unha imaxe harmoniosa duns elementos que forman parte do aspecto urbanístico de Castro de Rei. Inclúense no texto a aprobación das dimensións dos emprazamentos das terrazas, garantindo espazos suficientes para a mobilidades dos peóns, a ordenación do mobiliario das terrazas cos materiais que o compoñen e o control sobre a publicidade nel.

A estética urbana é un obxectivo que beneficiará ao propio sector hostaleiro, toda vez que ofrecerá no termo municipal unha estampa singular e harmónica, atractivo non só para os veciños do Concello, senón tamén para os visitantes. Xunto a isto, preténdese eliminar prácticas molestas, tales como interceptar os accesos ás vivendas nas zonas de lecer comunitarias, eliminar elementos accesorios dos locais de hostalería que non deben figurar no exterior, ou reducir o exceso de emisións acústicas. En definitiva, preténdese fomentar a calidade de vida.

A presente ordenanza formula un tratamento das terrazas desde un punto de vista integral, que recolle non só o aspecto estético e a racionalización do espazo público ocupado, senón tamén de maneira específica os aspectos relacionados coa accesibilidade. Os principios de accesibilidade universal deben aplicarse sistematicamente a todos os ámbitos do contorno exterior, en condicións de seguridade, comodidade, eficacia e autonomía.

A presente ordenanza estrutúrase en V títulos, con corenta (40) artigos e disposición final.

O Título I contén as disposicións xerais relativas ao obxecto e ámbito de aplicación, os tipos de instalacións autorizables e os establecementos que poderían obter a autorización de terraza.

O Título II, estruturado en seis capítulos, refírese ás condicións técnicas para a instalación. Nel regúlase a posible localización das terrazas, a superficie de ocupación en tramos de beirarrúa e os límites necesarios para garantir o tránsito peonil e a accesibilidade.

O Título III, refírese a criterios xerais do mobiliario e elementos da terraza que se complementan cos criterios específicos a que se refire o Anexo I.

O Título IV regula o título habilitante para a instalación de terrazas, a súa natureza, os requisitos para a súa obtención, a transmisibilidade e vixencia, o procedemento administrativo establecido para o outorgamento, así como o réxime da súa extinción, modificación ou suspensión.

Por último, o Título V establece o réxime de inspección e sancionador así como o procedemento para o seu exercicio, conforme os principios e disposicións legais na materia, dirixido a depurar as responsabilidades en que os responsables das terrazas poden incorrer e a restituír a legalidade vulnerada coa infracción.

Esta ordenanza foi elaborada tendo en conta o disposto na normativa reguladora de accesibilidade, a Orde ministerial VIV/561/2010, do 1 de febreiro, pola que se desenvolve o documento técnico de condicións básicas de accesibilidade e non discriminación para o acceso e utilización dos espazos públicos urbanizados, así como a

Lei 10/2014, do 3 de decembro, de accesibilidade. (DOG 241 do 17/12/2014) e o Decreto da Xunta de Galicia 35/2000 (DOG 29/02/2000).

TÍTULO I.- DISPOSICIÓN XERAIS

Artigo 1.- Obxecto e ámbito de aplicación

Artigo 2.- Definicións e tipos de instalacións

Artigo 3. Normativa aplicable

Artigo 4. Compatibilidade entre o uso público e a utilización privada dos espazos públicos ocupados por terrazas

Artigo 5.- Título habilitante

Artigo 6.- Horario de funcionamento

TÍTULO II.- CONDICIÓN DE INSTALACIÓN

CAPÍTULO I.- Condicións xerais

Artigo 7.- Limitacións

Artigo 8.- Superficie autorizada

Artigo 9.- Delimitación da superficie ocupable

Artigo 10.- Desenvolvemento lonxitudinal

CAPÍTULO II.- Condicións de instalación en beirarrúas

Artigo 11.- Ocupación en beirarrúas

CAPÍTULO III.- Condicións de instalación en calzada sobre aparcamentos.

Artigo 12.- Ocupación con mesas en calzada sobre aparcamentos

CAPÍTULO IV.- Condicións de instalación en prazas e espazos libres

Artigo 13.- Prazas e outros espazos libres asimilables

CAPÍTULO V.- Condicións de instalación de terrazas con peche estable

Artigo 14.- Terrazas con peche estable

CAPÍTULO VI.- Condicións e prescricións adicionais

Artigo 15.- Condicións e prescricións adicionais

TÍTULO III.- MOBILIARIO E DEMAIS ELEMENTOS AUXILIARES

Artigo 16.- Criterios estéticos.

Artigo 17.- Ancoraxes

Artigo 18.- Publicidade

TÍTULO IV.- RÉXIME XURÍDICO

Artigo 19.- Sometemento a licenza

Artigo 20.- Natureza da licenza

Artigo 21.- Solicitante

Artigo 22.- Solicitud de autorización e documentación adxunta

Artigo 23.- Procedemento de tramitación

Artigo 24.- Renovación das autorizacións

Artigo 25.- Ámbito temporal ou período de funcionamento das terrazas

Artigo 26.- Vixencia das licenzas e retirada das instalacións

Artigo 27.- Suspensión, modificación e revogación da autorización

Artigo 28.- Obrigas do titular da instalación

Artigo 29.- Taxas

TÍTULO V.- RÉXIME DE INSPECCIÓN E PROCEDEMENTO SANCIONADOR

Artigo 30.- Inspección e réxime de actuacións

Artigo 31.- Réxime sancionador.

Artigo 32.- Suxeitos responsables

Artigo 33.- Procedemento sancionador

Artigo 34.- Órgano competente

Artigo 35.- Medidas cautelares

Artigo 36.- Infraccións

Artigo 37.- Clasificación das infraccións

Artigo 38.- Sancións

Artigo 39.- Prescrición

Artigo 40.- Reposición da legalidade. Compatibilidade

DISPOSICIÓN FINAL

ANEXO I

TÍTULO I.- DISPOSICIÓN XERAIS

Artigo 1.- Obxecto e ámbito de aplicación

1.- A presente ordenanza ten por obxecto regular o réxime técnico, estético e xurídico a que debe someterse o aproveitamento de terreos de dominio público e espazos privados de acceso libre e uso público, mediante a súa ocupación temporal con terrazas, no exterior de establecementos hostaleiros e que constitúan complemento da actividade que se vén exercendo no interior dos ditos locais; co fin de garantir o equilibrio de intereses entre o sector hostaleiro e os peóns e demais usuarios da vía pública, coordinando estes elementos co seu entorno.

Aqueles terreos de dominio público sobre os que recaia competencia doutras administracións públicas, sobre os que se pretendan situar as instalacións anteriormente referidas, suxeitaranse ás determinacións da presente ordenanza, sen prexuízo das propias condicións que impoñan as ditas administracións no ámbito das súas respectivas competencias.

2.- As normas desta ordenanza serán de aplicación específica as instalacións de terrazas anexas aos establecementos de hostalería con mesas, cadeiras, separadores e parasoles, ou instalacións análogas complementarias da actividade realizada nos locais.

3.- Esta ordenanza non lles será de aplicación aos actos de ocupación que, sendo de carácter hostaleiro, se realicen con ocasión da realización de festas, actividades deportivas, culturais, gastronómicas e análogas, que se suxeitarán ás súas normas específicas.

4.- A ocupación do dominio público e dos espazos exteriores de uso público por quioscos ou instalacións permanentes, aínda cando se realicen só con instalacións móbiles ou desmontables, rexerá pola súa normativa específica e requirirá o título administrativo que sexa esixible en cada caso.

Non obstante o anterior, a presente ordenanza seralle de aplicación supletoria á instalación de terrazas por estes establecementos, en todo o que non se opoña á súa normativa específica ou non sexa incompatible coa súa natureza.

Artigo 2.- Definicións e tipos de instalacións

1.- Para os efectos desta norma, defínese como terraza a instalación de carácter temporal formada por mesas, cadeiras, xardineiras, parasoles, toldos, mamparas separadoras, soportes para testos ou outros elementos de mobiliario auxiliares, fixos ou móbiles e en todos os casos facilmente desmontables, situada no espazo exterior de uso público colindante ou próximo a un establecemento de hostalaría, como zona vinculada á actividade que se exerce no dito establecemento e sen barra de servizo distinta á situada no interior deste.

2.- Os aproveitamentos temporais que son obxecto da presente ordenanza suxeitaranse a algúns dos seguintes tipos:

2.1.- Clasificación de tipos con respecto ao peche:

a) Terraza sen peche estable: entendido por tal a terraza composta por elementos móbiles e desmontables e sen cuberta fixa ou estable. Inclúiranse nesta modalidade as instalacións que ademais contén con toldo enrolable á fachada.

b) Terraza con peche estable: entendendo por tal a terraza composta por elementos fixos e móbiles pero, en todo caso, facilmente desmontables, cerrada no seu perímetro, en todo ou en parte e/ou cuberta.

2.2.- Clasificación de tipos con respecto á ubicación da ocupación:

- a) Terraza con mesas sobre a beirarrúa.
- b) Terraza con mesas sobre a calzada, en ocupación de aparcamento.

Artigo 3. Normativa aplicable

As instalacións reguladas no artigo anterior quedarán suxeitas, ademais, á normativa sobre espectáculos públicos e actividades recreativas, de protección do patrimonio, accesibilidade e supresión de barreiras, de protección do medio, así como calquera outra normativa sectorial que resulte de aplicación, polo que as súas determinacións serán plenamente esixibles aínda cando non se faga referencia expresa a ela nesta ordenanza.

Artigo 4. Compatibilidade entre o uso público e a utilización privada dos espazos públicos ocupados por terrazas

A instalación de terrazas nos espazos de uso público é un uso común especial e a súa autorización deberá atender a criterios de compatibilización do uso público coa utilización privada; deberán prevalecer nos casos de conflito o uso público do dito espazo e o interese xeral.

Para tal efecto, teranse en conta os seguintes valores e criterios:

- a) Preferencia do uso común xeral, con especial atención ao tránsito peonil; deberase garantir que as terrazas non mermen a accesibilidade aos espazos destinados ao uso público, en condicións de fluidez, comodidade e seguridade.
- b) Garantía da seguridade vial
- c) Protección da seguridade cidadá e da tranquilidade pública, en especial contra a contaminación acústica.
- d) Preservación do arboredo e vexetación da paisaxe urbana.
- e) Protección do uso e dos dereitos e intereses das persoas usuarias dos edificios lindeiros.
- f) Garantía do funcionamento dos servizos públicos, en especial os de urxencia.

Artigo 5.- Título habilitante

1.- Conforme a Lei 9/2013, de 19 de decembro, do emprendemento e competitividade económica de Galicia, en atención á concorrencia de razóns de interese xeral derivadas da necesaria protección da seguridade e saúde pública, dos dereitos das persoas consumidoras e usuarias, do mantemento da orde pública, así como da adecuada conservación do ambiente e do patrimonio histórico artístico, será precisa a obtención de licenza ou autorización para, entre outros, "a instalación de terrazas ao aire libre ou na vía pública, anexas ao establecemento".

2.- A instalación de terrazas no Concello de Castro de Rei require a obtención previa de licenza municipal nos termos recollidos nesta ordenanza e demais normativa de aplicación.

3.-As licenzas para a ocupación temporal do dominio público municipal con terrazas vinculadas a establecementos de hostalería serán outorgadas polo Alcalde do Concello de Castro de Rei, que poderá delegar esta facultade de acordo co que dispoñía a normativa básica sobre réxime local.

Sen prexuízo da autorización concedida, por Resolución da Alcaldía debidamente motivada, poderase modificar as condicións de uso, temporalmente e por razóns de orde público ou de circunstancias especiais do tráfico, sen máis procedemento que o aviso con suficiente antelación ao titular da licenza, xustificando a medida adoptada e tendo en conta que a medida limitarase ao mínimo tempo posible, segundo as circunstancias excepcionais que a motiven.

Artigo 6.- Horario de funcionamento

1.- O horario de ocupación da superficie de dominio público autorizado será o que corresponda coa licenza de apertura do negocio de hostalería titular do permiso.

2.- En ningún caso se poderá facer uso da instalación da terraza fóra do horario permitido, nin deixar o mobiliario constitutivo dela no exterior do recinto fóra dese horario. O incumprimento deste precepto, xunto coa revogación da licenza, poderá dar lugar á instrución dun procedemento sancionador.

TÍTULO II.- CONDICIÓN DE INSTALACIÓN

CAPÍTULO I.- Condicións xerais

Artigo 7.- Limitacións

1.- A autoridade municipal competente poderá, de maneira suficientemente razoada, denegar a solicitude destas instalacións temporais en calquera dos seguintes supostos:

- Que supoña prexuízo para a seguridade viaria.

- Que por particulares características físicas ou por razón do nivel ou intensidade do tránsito peonil, poida resultar inconveniente desde o punto de vista da seguridade das persoas, da súa mobilidade e accesibilidade.

-Que poida incidir sobre a seguridade e/ou evacuación dos edificios e locais próximos.

- Que dificulte a intervención de servizos públicos ou privados en caso de urxencia, tales como bombeiros, ambulancias etc.

- Que supoñan deterioro do medio urbano ou resulten inadecuadas ou discordantes co seu contorno.

- Que impida ou dificulte gravemente o uso de servizos, equipamentos e/ou mobiliarios urbanos.

- Que resten visibilidade a outros establecementos.

- Que impidan o libre acceso a: outros inmobles e o propio establecemento hostaleiro, garaxes, bocas de rego ou hidrantes, rexistros de sumidoiros, saídas de emerxencia, paradas de transporte público, pasos de peóns e similares.

- Calquera outra circunstancia similar de interese público.

2.- Queda absolutamente prohibida a instalación de billares, futbolíns, máquinas recreativas, de azar, expendedoras de bebidas, grellas, barras de servizo, e de calquera outro tipo análogo, nas terrazas obxecto de regulación na presente ordenanza.

Así mesmo queda prohibida a instalación de calquera clase de aparellos reprodutores de imaxe e son, así como a celebración de espectáculos ou actuacións musicais, agás autorización municipal expresa.

En ningún caso se poderán instalar na vía pública nin na beirarrúa, nos estacionamentos ou na calzada aparellos de cociña que provoquen fumes ou cheiros tales como barbacoas, grellas, etc, salvo dispensa expresa da Alcaldía en casos excepcionais debidamente solicitados en períodos de festas, que non poderá superar os 3 días.

Artigo 8.- Superficie autorizada

1.- A superficie máxima autorizada conformarase polo perímetro exterior total do conxunto de todos os elementos que haxa que instalar dispostos para a prestación de servizo e quedará, así mesmo, delimitada no plano detalle da autorización.

2.- Non se permitirá ningunha clase de obra de fábrica ou albanería sobre as zonas de dominio público que incumpran as prescricións da presente ordenanza. Non poderán realizarse instalacións de mobiliario distintas das expresamente autorizadas.

Artigo 9.- Delimitación da superficie ocupable

1.- O concello, se o considera necesario por razóns de favorecemento do tráfico peonil, de seguridade ou simplemente estéticas, poderá requirir ao titular que estableza pola súa conta un sistema de sinalización da superficie máxima de ocupación autorizada.

2.- O dito sistema nunca poderá supor ningún risco para os peóns nin ningún dano ou alteración no espazo público e deberá cumprir coa normativa sobre accesibilidade.

Artigo 10.- Desenvolvemento lonxitudinal

1.- O desenvolvemento lonxitudinal máximo da terraza de cada establecemento, incluídas as súas proteccións laterais no seu caso, non superará o fronte da fachada do local soporte da

actividade principal, deixando libres 50 centímetros de cada un dos laterais con cada colindante; se ben poderá ampliarse ata o citado límite máximo previo consentimento por escrito dos veciños colindantes afectados que deberá achegarse xunto coa solicitude de licenza.

Excepcionalmente, a xuízo dos servizos técnicos, poderase permitir que as instalacións superen o dito fronte sempre e cando se cumpran os seguintes requisitos:

- En todo caso, non poderá superar a fachada do edificio propio nin as dos lindeiros.

- Cando o desenvolvemento lonxitudinal teña lugar xunto á fachada, deberase achegar o documento que acredite a conformidade das persoas titulares dos dereitos dos locais ou fincas lindeiras. A acreditación incluírá a manifestación do outorgamento do permiso explícito, expreso e non condicionado, por toda a duración da temporada en que pretenda instalarse a terraza.

- No caso de instalacións dispostas xunto ao beirado da beirarrúa e cando existan varios establecementos que opten á instalación de terraza, o espazo repartirase, se proceder, de forma proporcional á lonxitude das fachadas dos respectivos establecementos.

CAPITULO II.- Condicións de instalación en beirarrúas

Artigo 11.- Ocupación en beirarrúas

1.- A ocupación da beirarrúa establecerase en proporción ao ancho total desta. Garantirase sempre un itinerario peonil libre mínimo de 1,80 metros, en cumprimento da Orde VIV/561/2010, de 1 de febreiro, pola que se desenvolve o documento técnico de condicións básicas de accesibilidade e non discriminación para o acceso e utilización dos espazos públicos urbanizados.

2.- O ancho mínimo das beirarrúas sobre as que se permite a instalación de terrazas será de 2,20 metros, medidos desde a aliñación oficial á cara exterior do beirado da beirarrúa.

Excepcionalmente, e atendendo á intensidade do tránsito peonil da vía, poderanse autorizar –en beirarrúas de ancho inferior a 2,20 metros de anchura mínima, terrazas formadas unicamente por elementos de dimensións reducidas, tales como mesas altas, dispostos en sentido lonxitudinal. En todo caso, debe quedar garantido o cumprimento do itinerario peonil

mínimo libre de 1,50 m.

3. A instalación poderase colocar xunto á fachada do establecemento ou en zona límite de beirarrúa con beirado.

De situarse xunto á fachada, deberá quedar delimitada mediante elementos de protección –de carácter móbil e desmontable- que lles permitan identificar o obstáculo ás persoas invidentes.

Caso de se situaren en zona límite de beirarrúa con beirado, os elementos da terraza deberanse separar do beirado da beirarrúa, cando menos, 40 cm naqueles supostos en que coincida con prazas de aparcadoiro ou cando así resulte necesario para a seguridade dos viandantes e o tráfico en xeral. A instalación deberá contar, ademais, con elementos de protección que poidan proporcionar a debida seguridade a criterio dos servizos técnicos.

Poderanse autorizar disposicións distintas cando o solicite a persoa interesada e/ou existan razóns especiais que así o aconsellen, as cales deberán ser valoradas, en cada caso, polos servizos técnicos. Nestes casos, só se autorizará a instalación, cando poida situarse a curta distancia do establecemento principal de que dependa, exista un fácil tránsito entre esta e o local e a súa dependencia deste último resulte facilmente recoñecible por calquera usuario da instalación.

4.- Cando existan espazos axardinados lonxitudinais que formen parte da beirarrúa, a anchura sinalada no apartado 2 do presente artigo referirase á zona libre de axardinamento e destinada a tránsito peonil.

CAPITULO III.- Condicións de instalación en calzada sobre aparcamentos.

Artigo 12.- Ocupación con mesas en calzada sobre aparcamentos

1.- Para a ocupación da calzada sobre aparcamentos, con mesas, cadeiras e outros elementos de mobiliario auxiliares, deberá cumprir as seguintes condicións:

a) Será en todo caso obrigatoria a colocación dunha tarima ou plataforma.

b) Establécese a distinción segundo o aparcamento de vehículos estea permitido en liña ou en batería.

2.-Terraza en ocupación de aparcamento en liña: Non se autorizará ningún tipo de terraza, salvo en calzadas de dobre circulación cun mínimo de 9 metros de ancho e nas de un só sentido de circulación, cun ancho mínimo de 6 metros lineais. Nestes supostos a tarima terá un ancho máximo de 2,2 metros (ou o ancho da praza da liña de aparcamentos de ser inferior). O desenvolvemento lonxitudinal da terraza non excederá en ningún caso das condicións establecidas no artigo 10 da presente ordenanza. Fíxase o paso mínimo entre dúas terrazas contiguas en 1,50 m.

3.-Terraza en ocupación de aparcamento en batería: A anchura da zona de ocupación en calzada non excederá en ningún caso de 3,50 metros sobre tarima. Manterase sempre un mínimo de 4 metros de carril libre en rúas de circulación rodada de sentido único e 7 metros en dobre sentido. O desenvolvemento lonxitudinal da terraza non excederá en ningún caso das condicións establecidas no artigo 10 da presente ordenanza. Fíxase o paso mínimo entre dúas terrazas contiguas en 1,50 m.

4.- Características da tarima en zona de estacionamento: Na instalación de terrazas en zonas de calzada con uso aparcamento, sobre a superficie autorizada colocase unha tarima en contacto co beirado da beirarrúa e sen sobrepassar o nivel do mesmo, coas seguintes características:

a) Deberá estar balizada perimetralmente polos lados en contacto coa área propia dos vehículos con cortaventos ou mamparas como elementos delimitadores e de protección, que serán en todo caso acordes á imaxe do entorno urbano no que se atopan. A altura máxima da parte opaca do elemento de balizamento será de 1,20 metros. No lateral en contacto coa beirarrúa poderá estar delimitada, no caso de estar cuberta, con elementos de apertura corredeira e materiais acordes co conxunto da terraza.

- b) Deberán estar construídas con materiais ignífugos e pavimento de caucho ou madeira para evitar a emisión de ruídos.
- c) A súa instalación permitirá a limpeza diaria tanto da propia tarima coma do pavimento sobre o que esta colocada.
- d) A tarima colocarse superposta sobre a superficie autorizada, sen fixación algunha ao pavimento. Irá adosada ao beirado da beirarrúa e sen sobrepasar o nivel do mesmo.
- e) Contará con elementos captafaros ou reflectores nas esquinas.
- f) O acceso á terraza realizarase obrigatoria e exclusivamente pola beirarrúa.

5.- Permítese a cubrición da terraza con elementos parcial ou totalmente translúcidos e precisará do uso de separadores a modo de peche estable nos laterais en contacto coa área propia dos vehículos, cunha altura máxima opaca de 1,20 m, e cumprindo en todo caso co indicado no artigo 15 desta ordenanza relativo á altura interior mínima de 2,20 metros.

CAPITULO IV.- Condicións de instalación en prazas e espazos libres

Artigo 13.- Prazas e outros espazos libres asimilables

As solicitudes de autorización para instalar terrazas nestes espazos serán resoltas pola Administración municipal segundo singularidades da zona e conforme as seguintes limitacións xerais:

- A superficie de ocupación total establecerase, en cada caso, atendendo ao uso principal a que esta destinada a praza, así como a súa xeometría e características concretas. En todo caso, sempre se garantirá a existencia dun itinerario peonil libre de obstáculos cunha anchura mínima de 1,80 metros en cada aliñación de fachada e/ou un central segundo as condicións do

mobiliario urbano existente.

- En caso de pretenderse a instalación de terrazas exentas (non adosadas á fachada) e existindo varias solicitudes de ocupación, á falta de acordo entre os solicitantes, a Administración municipal atribuiralles a cada un deles en proporción aos metros da fachada que dean fronte ao espazo público.

CAPÍTULO V.- Condicións de instalación de terrazas con peche estable

Artigo 14.- Terrazas con peche estable

1.- Este tipo de instalación poderase autorizar na categoría definida no artigo 2 como "Terraza con mesas sobre a calzada en ocupación de aparcamento", logo da valoración técnica do Proxecto presentado polas persoas interesadas, de acordo coas condicións específicas que indiquen en cada suposto os servizos técnicos municipais e coas que se sinalan na presente ordenanza. Estas instalacións, polo seu carácter provisional, deberán ser facilmente desmontables e deberanse procurar solucións homoxéneas.

2.- A alternancia de distintos tipos de terraza (con e sen peche estable) nunha praza ou espazo libre estudarase en cada caso e poderanse denegar calquera dos dous tipos, por razóns estéticas.

3.- Só se autorizarán terrazas con peche estable, como norma xeral, sen superar a fronte da fachada do establecemento de hostalaría ao que lle dá servizo.

4.- A altura exterior máxima da estrutura será acorde coas condicións do edificio, do contorno e doutras circunstancias e, en calquera caso, a altura interior mínima será de 2,20 metros.

5.- O desenvolvemento lonxitudinal da terraza tipo "con peche estable" non excederá en ningún caso das condicións establecidas no artigo 10 da presente ordenanza.

6.- O órgano municipal poderá denegar a solicitude de terraza tipo "con peche estable" cando resulte formalmente inadecuada ou discordante co seu contorno ou dificulte a lectura correcta da paisaxe urbana

7.- O peche do lateral así como da cuberta da terraza deberá desenvolverse sen fixación algunha nin ao pavimento nin á fachada do local de hostalaría ao que dea fronte e servizo. O seu funcionamento estrutural deberá resolverse con independencia das edificacións tradicionais próximas, e por medios facilmente desmontables.

8.- En todo caso deixará completamente libre a beirarrúa que se sitúe entre a terraza autorizada e a terraza sobre calzada.

9.- Os materiais axustaranse ao indicado no ANEXO, así como no Título III da presente ordenanza.

CAPÍTULO VI.- Condicións e prescricións adicionais

Artigo 15.- Condicións e prescricións adicionais

1.- As terrazas deberanse integrar co mobiliario urbano existente, de modo que non dificulten ou impidan a visibilidade e o uso correcto dos elementos que xa se encontran instalados na vía pública.

En casos debidamente xustificados, e a criterio dos servizos técnicos, poderanse desprazar ou recolocar determinados elementos de servizos, equipamentos e/ou mobiliario urbano, sempre que non supoña dano para o espazo público nin prexuízo para o interese xeral. O custo será asumido polo interesado.

2.- En todo caso, e independentemente do tipo de ocupación de que se trate, deberanse deixar completamente libres para a súa utilización inmediata polos servizos correspondentes: as bocas de rega e hidrantes, os rexistros de redes de sumidoiros, os centros de transformación, así como calquera outro tipo de elemento destinado á prestación de servizos afectos ao interese xeral.

3.- Non poderá colocarse ningún elemento de mobiliario que dificulte o acceso a edificios, locais comerciais ou de servizos, pasos de peóns, prazas de aparcadoiro reservadas para persoas con mobilidade reducida, saídas de urxencia, vaos ou pasos de vehículos, paradas de transporte público, nin cando oculten, total ou parcialmente, ou dificulten a visibilidade da sinalización de tráfico ou de tipo informativo.

4.- En calquera caso, respectarase unha distancia suficiente entre os elementos da terraza que se pretenden instalar e calquera outro elemento de equipamento ou mobiliario urbano, tales como: farois, bancos, árbores etc. que garantan a súa función e que permitan os labores de mantemento.

5.- Non se autorizará colocar ningún elemento nas ramplas de acceso a pasos de peóns nin nas franxas sinalizadoras de pavimento táctil dos itinerarios peonís; deberase garantir o cumprimento das distancias establecidas na normativa de accesibilidade.

6.- En ningún caso, a instalación de terraza poderá realizarse sobre superficies axardinadas.

7.- Non se permitirá a instalación de calquera clase de aparatos reprodutores de imaxe e/ou son nas terrazas.

8.- Non se permitirá a instalación de mostradores de atención ao público ou outros elementos para o servizo da terraza, que deberá ser atendida desde o propio establecemento.

9.- Queda prohibida a instalación de mostradores ou vitrinas expositoras, frigoríficos, cociñas, asadores, máquinas expendedoras de produtos, recreativas, de xogos de azar, billares, futbolíns ou calquera outra de característica análoga.

10.- A instalación na vía pública de reclamos publicitarios, tales como: encerados, atrás, manequíns, soportes para colocar testos, anuncios dos produtos á venda e letreiros de prezos na superficie da vía pública, queda limitada á superficie obxecto de ocupación pola terraza autorizada.

11.- Algunha das fachadas do establecemento deberá ofrecer fronte cara ao espazo proposto para a instalación da terraza.

12.- Queda prohibida a impresión de publicidade nos elementos de mobiliario e accesorios das terrazas de hostalería, salvo a vinculada co nome do establecemento ao que pertence.

TÍTULO III.-MOBILIARIO E DEMAIS ELEMENTOS AUXILIARES

Artigo 16.-Criterios estéticos.

1.- Os elementos que ocupen o espazo acoutado autorizado para a instalación da terraza, tales como: mesas, cadeiras, toldos, parasoles, *mamparas*, soportes para testos ou outros auxiliares deberán reunir as características que se entendan precisas para a súa función, de material resistente, de fácil limpeza e de boa calidade. Deberán harmonizar entre si e co contorno urbano en que se sitúe en cromatismo, materiais e deseño.

Así mesmo, deberán reunir as debidas condicións de estabilidade e seguridade, sen que polas súas características, uso previsible, disposición ou modo de instalación poidan supor un risco para as persoas usuarias da instalación ou para os viandantes nin para os bens públicos ou privados.

Igualmente, deberán contar con elementos de protección que eviten a xeración de ruídos durante o seu desprazamento ou manexo.

2.- Todos os elementos que se instalen ao servizo das terrazas axustaranse, canto ás súas

características, ás contidas na presente ordenanza e deberán figurar na documentación da solicitude formulada para a súa instalación, e cumpriran cos requisitos establecidos no Anexo da presente ordenanza.

3.- Non se poderán realizar instalacións distintas nin colocarse mobiliario, elementos decorativos ou revestimentos de chan que non estean incluídos expresamente na autorización.

4.- O tipo de mobiliario autorizable, con carácter xeral, así como as características, materiais, cores, condicións de instalación e documentación específica que cómpre presentar coa solicitude etc. figuran nesta ordenanza.

Artigo 17.- Ancoraxes

1.- Con carácter xeral, non se permitirá a ancoraxe ao pavimento ou fachadas de edificacións existentes de ningún elemento da terraza.

2.- Excepcionalmente, e en casos debidamente xustificadas, poderase autorizar a instalación de elementos ancorados. A autorización quedará condicionada ao depósito dunha fianza en

garantía do custo de reposición de bens, servizos ou espazos públicos afectados e cuxo importe será determinado polos servizos técnicos.

Artigo 18.- Publicidade

1.- Queda prohibida toda clase de publicidade na instalación de terrazas e en calquera dos seus elementos.

2.- Non se considerará publicidade a inserción do nome comercial ou logotipo do establecemento en toldos, parasoles ou nas *mamparas*, con dimensións discretas e estéticas.

TÍTULO IV.- RÉXIME XURÍDICO

Artigo 19.- Sometemento a licenza

1.- Conforme a Lei 9/2013, de 19 de decembro, do emprendemento e competitividade económica de Galicia, en atención á concorrencia de razóns de interese xeral derivadas da necesaria protección da seguridade e saúde pública, dos dereitos das persoas consumidoras e usuarias, do mantemento da orde pública, así como da adecuada conservación do ambiente e do patrimonio histórico artístico, será precisa a obtención de licenza ou autorización para, entre outros, "a instalación de terrazas ao aire libre ou na vía pública, anexas ao establecemento".

2.- A implantación de instalacións de terraza requirirá de licenza municipal previa.

As licenzas outorgaráselles directamente aos peticionarios que reúnan as condicións requiridas tras seguir o procedemento establecido na Lei 39/2015, de 1 de outubro, do Procedemento Administrativo Común das Administracións Públicas.

Artigo 20.- Natureza da licenza

1.- As licenzas facultan o seu titular para realizar o aproveitamento nas condicións concretas con que se outorgan e non lle conceden ao seu titular máis dereitos que os propios contidos nesta ordenanza.

2.- Só serán transmisibles conxuntamente coas licenzas urbanísticas dos establecementos aos que estean vinculadas. O antigo e o novo titular deberánlle comunicar esta circunstancia ao concello.

3.- As licenzas para a instalación de terraza non poderán ser obxecto, en ningún caso, de arrendamento ou cesión independente para a súa explotación. O incumprimento dará lugar á perda de vixencia da dita licenza.

4.- As licenzas poderán ser revogadas unilateralmente pola Administración concedente, en calquera momento, por razóns de interese público, sen xerar dereito a indemnización.

5.- A licenza sempre se entenderá outorgada, salvo o dereito de propiedade e sen prexuízo do de terceiro.

Artigo 21.- Solicitante

1.- Poderá solicitar licenza para a instalación de terraza o titular da licenza de actividade do establecemento de hostalería ao que se pretenda vincular.

2.- Serán requisitos para obter a autorización:

a) A licenza de actividade deberá estar en vigor. Porén, poderase formular a solicitude sempre e cando se encontre en tramitación, se ben non poderá concederse ata que se estea en posesión da precitada licenza.

b) Non ter débedas coa Facenda municipal, o que será verificado polos servizos municipais correspondentes.

c) O titular da instalación deberá dispor dun seguro de responsabilidade civil e de incendios que lles dea cobertura aos posibles riscos que puideren derivarse para as persoas e/ou as cousas con motivo do funcionamento, instalación e retirada da instalación e durante o período de vixencia desta.

Artigo 22.- Solicitude de autorización e documentación adxunta

1.- Na solicitude, ademais do indicado na Lei 39/2015, de 1 de outubro, do Procedemento Administrativo Común das Administracións Públicas, faranse constar:

a) Nome ou razón social da persoa interesada e, se for o caso, nome comercial e domicilio do establecemento hostaleiro ao que vai asociada a terraza.

b) Especificación de se a instalación que se pretende se sitúa en espazo de dominio público ou privado de uso público, así como o tipo de instalación de terraza conforme a clasificación do artigo 2 desta ordenanza.

c) Período de tempo de ocupación solicitado. En caso de que non se faga constar, entenderase que o período de funcionamento ao que se opta é anual, ao que se refire o art. 25.

2.- Con carácter xeral, as solicitudes que se presenten deberán ir acompañadas da seguinte documentación:

a) Copia do documento nacional de identidade do/a interesado/a, se for persoa física, ou do número de identificación fiscal, se for persoa xurídica.

b) Fotocopia da licenza municipal de apertura do establecemento solicitante ou referencia ao seu expediente de outorgamento.

c) Memoria descritiva do tipo de ocupación que se vai realizar e relación detallada de todos os elementos de mobiliario e auxiliares que se pretenden instalar. Deberá indicarse: superficie que se vai ocupar, expresada en metros cadrados; elementos de mobiliario, así como a súa clase, natureza, número, dimensións e cores e características técnicas. Conterá fotografías, infografías ou catálogo, no seu caso, das características dos distintos elementos.

d) Documentación fotográfica da fachada do establecemento e do espazo exterior en que se pretenda situar a terraza.

e) Plano de situación ou emprazamento do establecemento (cartografía municipal).

f) Plano de distribución en planta da terraza a escala 1:50 ou 1:100 (tres exemplares) no que se reflecta:

- O fronte da fachada do establecemento e acceso a este.

- Elementos de mobiliario que se pretendan instalar colocados en disposición de servizo ao usuario.

- A superficie total que van ocupar os elementos que compoñen a terraza.

- A xeometría completa.

- As franxas de itinerario peonil libre.

- A localización de calquera elemento situado na área de influencia da ocupación e que sexa preciso contemplar á hora de garantir o espazo libre necesario para compatibilizar o resto de usos do espazo público, con indicación da distancia existente entre a terraza e os ditos elementos. Toda a información deberá reflectirse convenientemente acoutada e con indicación de escala.

g) Documento acreditativo da vixencia e de estar ao corrente no pagamento da póliza de responsabilidade civil correspondente ao establecemento de hostalería.

h) Autoliquidación das taxas correspondentes.

i) Acreditación documental da conformidade dos titulares dos dereitos das fincas ou locais lindeiros no suposto establecido no artigo 10.1 para o caso en que as terrazas discorran xunto á fachada.

j) A documentación específica que, no seu caso, se esixa no anexo para determinadas instalacións (tarima, instalación eléctrica, calefactores etc.).

3.- Nas terrazas con peche estable, deberase achegar, ademais do establecido nos apartados anteriores, a seguinte documentación:

a) Proxecto técnico asinado por técnico/a competente que conterá, en función da complexidade da instalación pretendida:

a.1.) Memoria, na que se incluírá, ademais do indicado no apartado 2.c) deste artigo, unha descrición pormenorizada das características da instalación da terraza e na que se acreditará expresamente o carácter desmontable.

a.2.) Planos: incluíranse tantos planos como sexan necesarios, para a definición en detalle dos elementos que se pretenda instalar. Cando menos, será necesario incluír, en función de cada caso concreto, os seguinte (ademais da indicada no apartado 2.e):

- Planta xeral.

- Plano de planta dos elementos de cubrición superior, no seu caso, no que se reflectan pendentes, puntos de recollida de augas etc.

- Alzados (laterais, frontal e posterior) e seccións.

- Planos de estrutura, nos que se reflectirá, especificamente, o sistema de suxeición ou apoio, no seu caso.

- Planos de instalacións, se for o caso.

- Planos de detalles. Presentaranse tantos como for necesario para permitir a execución correcta da terraza solicitada; prestaráselles especial atención aos detalles de unións e nós entre elementos estruturais.

a.3.) Anexo de cálculo da estrutura, cuxo contido será o establecido na norma vixente de aplicación. Neste documento, inclúiranse as esixencias relativas á capacidade portante, aptitude ao servizo, accións e combinacións consideradas, coeficientes de seguridade, comprobación dos estados límites e de estabilidade (empenamento), seguridade fronte á envorcadura, deslizamento e levantamento.

a.4.) Xustificación acerca da instalación pretendida á vixente sobre prevención e extinción de incendios, evacuación, estabilidade e clasificación de produtos en función das súas propiedades de reacción e resistencia ao lume.

Así mesmo, indicárase expresamente, no seu caso, que as instalacións (tales como iluminación etc.) se proxectan conforme a normativa vixente.

b) Documento de autoliquidación e ingreso da fianza establecida no art. 17.

c) Unha vez realizada a instalación, achegarase un certificado de fin de instalación, asinado por técnico/a competente.

4.- No caso de terrazas situadas en espazos privados de uso público, incluírase, ademais, como documentación específica:

a) Documento acreditativo da autorización dos titulares do emprazamento.

Artigo 23.- Procedemento de tramitación

1.- As solicitudes de licenza serán tramitadas polo órgano municipal competente, de acordo co establecido na lexislación de réxime local e de procedemento administrativo común.

2.- Unha vez formulada a solicitude nos termos esixidos na presente ordenanza, a unidade

encargada da súa tramitación solicitará os informes técnicos e xurídico, así como calquera outro que se considerar procedente.

3.- O prazo máximo para resolver e notificar a resolución será de dous meses.

4.- En todo caso, a instalación da terraza non se poderá realizar ata que non se obteña a autorización expresa.

5.- As resolucións que outorguen a licenza conterán a seguinte información: titular da autorización administrativa e nome ou razón social, NIF ou CIF; denominación comercial e enderezo do local do establecemento ao que se vincula a terraza; extensión da superficie autorizada que se vai ocupar; descrición dos elementos que se autoriza instalar, con indicación sucinta das súas características, así como o número de mesas e cadeiras e demais mobiliario auxiliar autorizado, período de vixencia da autorización; horario de funcionamento da terraza de ser diferente do establecido con carácter xeral e demais condicións particulares, no seu caso. Á notificación xuntaráse o plano de detalle que serviu de base para o seu outorgamento, debidamente selado, como parte integrante do título habilitante.

6.- No suposto de terrazas tipo con cerramento estable e nas que consideraren convenientes, no seu caso, os servizos técnicos, unha vez autorizada a instalación e previa ao seu funcionamento, deberán presentar na Administración municipal: certificado de adecuación da instalación de terraza á autorización concedida, asinado polo/a técnico/a competente.

Artigo 24.- Renovación das autorizacións

1.- As autorizacións serán renovables anualmente, por petición da persoa interesada e logo de comprobar os requisitos esixidos na presente ordenanza e o pagamento das taxas correspondentes.

2.- Conxuntamente coa solicitude de renovación, deberán achegar:

a) Declaración xurada de que non se modificaron as circunstancias que motivaron o outorgamento da autorización anterior, con indicación da referencia do expediente.

b) Xustificante de que se encontra en vigor a póliza de responsabilidade civil con cobertura para o prazo solicitado.

c) No seu caso, acreditación da vixencia da conformidade dos titulares lindeiros cando a terraza se sitúe xunto á súa fachada, nos termos establecidos no artigo 22.2. i)

3.- No caso de terrazas sitas en espazos de dominio privado e uso público, achegarase, ademais, a acreditación da vixencia da conformidade dos titulares do emprazamento nos termos do artigo 22.4.

4.- No suposto de que concorra calquera variación con respecto á última autorización administrativa, deberase solicitar e obter unha nova licenza municipal.

5.- Os servizos municipais comprobarán a existencia de que o titular non manteña débedas coa Facenda municipal para realizar a renovación.

Artigo 25.- Ámbito temporal ou período de funcionamento das terrazas

1.- As autorizacións poderán ser anuais ou de temporada, entendendo o carácter anual como de ano natural – do 1 de xaneiro ao 31 de decembro- e a temporada como o período comprendido entre o 1 de abril e o 30 de setembro, sen prexuízo de que estas se suxeiten ao réxime de renovación establecido na presente ordenanza.

2.- A persoa interesada poderá solicitar dispor de diferente mobiliario e de elementos auxiliares segundo as estacións do ano, se ben deberán comprenderse na solicitude ambas as solucións e ser obxecto de autorización. A superficie de ocupación non poderá sufrir ningunha modificación.

Artigo 26.- Vixencia das licenzas e retirada das instalacións

1.- A vixencia das autorizacións que se concedan corresponderanse co período de funcionamento autorizado; limitará a súa vixencia a un período máximo de doce meses de duración.

2.- Ao remate de cada xornada e do horario autorizado, deberanse retirar do espazo público todos os elementos da terraza.

3.- Para o tipo de terraza con cerramento estable, poderase autorizar a permanencia dalgún/s dos elementos da instalación no espazo autorizado, ata o termo da vixencia da autorización.

Unha vez transcorrido este período, o titular deberá retirar a instalación nun prazo máximo de 48 horas e devolver o espazo ao seu estado anterior.

Artigo 27.- Suspensión, modificación e revogación da autorización

1.- O incumprimento grave, por parte do titular, dos límites e condicións da licenza poderá dar lugar, con independencia das sancións que puideren proceder, á súa revogación. Consideraranse incumprimentos graves os tipificados como infracción grave e moi grave nesta ordenanza.

2.- En todo momento, as licenzas poderán ser revogadas motivadamente por razóns de interese xeral, sen dereito a indemnización. En especial, procederá a revogación cando

resultaren incompatibles coas normas ou criterios aprobados con posterioridade; lle produzan danos ao espazo público; impidan a súa utilización para actividades de maior interese público; menoscaben ou dificulten o uso xeral; se alteren os supostos determinantes do seu outorgamento ou sobreveñan circunstancias que, de existiren naquel tempo, xustificarian a denegación.

3.- Polas mesmas razóns e nas mesmas condicións do apartado anterior, a Administración poderá modificar as licenzas en canto a localización, extensión ou calquera outro aspecto.

4.- A licenza poderá quedar suspendida temporalmente; caso en que se ordenará a retirada das instalacións por conta do titular, cando circunstancias de tráfico; situación de urxencia; realización de eventos públicos promovidos ou autorizados polo concello, así como pola realización de obras de curta duración; esixencias dos servizos públicos ou circunstancia de interese xeral así o aconsellen, e iso sen dereito a ningunha indemnización. A suspensión terá a duración imprescindible e a licenza recobrará a súa eficacia en canto desaparezan as circunstancias que a xustificaron; en todo caso, sen necesidade de resolución administrativa. Nestes casos, non haberá dereito á devolución de taxas.

5.- Así mesmo, con motivo da execución de obras e/ou servizos públicos ou privados autorizados, o concello poderá revogar, modificar ou suspender temporalmente a autorización concedida, mediante unha resolución motivada. Nestes casos, non se xerarán ningún tipo de dereitos dos establecementos afectados a ningunha compensación, a excepción do reintegro, no seu caso, da parte proporcional do importe aboado en concepto de taxa municipal polo aproveitamento especial correspondido ao período non utilizado.

6.- A extinción ou suspensión da autorización administrativa de apertura ou peche por calquera

causa legal do local ou establecemento desde o que se deba atender a terraza determinarán igualmente a extinción automática ou a suspensión da licenza de terraza sen necesidade de resolución administrativa.

Artigo 28- Obrigas do titular da instalación

Sen prexuízo de que as obrigas de carácter xeral, e das que se deriven da aplicación da presente ordenanza, será obrigación do titular da instalación:

1.- Respetar as condicións impostas na autorización concedida.

2.- Manter, tanto o chan cuxa ocupación se autoriza como a terraza e cada un dos elementos que a compoñen, nas debidas condicións de limpeza, seguridade e ornato. Para tales efectos, deberase dispor dos elementos correspondentes de recollida e almacenamento de residuos para manter en condicións de limpeza o espazo de uso público.

Ao remate de cada xornada, deberanse realizar as tarefas de limpeza necesarias no chan ocupado.

A limpeza que deban efectuar os servizos municipais, en substitución do titular da autorización, liquidarase polo procedemento recollido para as execucións subsidiarias.

3.- Velar para que os usuarios non alteren a orde nin realicen actividades ruidosas que lles xeren molestias aos veciños ou aos demais usuarios do espazo público.

4.- Adoptar as previsións necesarias para que os usuarios da terraza non sobrepasen os límites do espazo autorizado.

5.- Non se permitirá utilizar a vía pública como almacén ou lugar de depósito e amontoamento de mobiliario ou calquera outro elemento, aínda cando se efectúe na porción de espazo público autorizado.

6.- Retirar, ao termo de cada xornada e do horario autorizado, todos os elementos instalados, que serán recollidos diariamente no interior do local ao que dá servizo a terraza ou nun local habilitado para tal finalidade polo interesado, salvo que na autorización se establecese a non obrigatoriedade de recollida de determinados elementos en caso de terraza con cerramento estable.

Os toldos deberán permanecer recollidos fóra do horario autorizado.

7.- Deberá prestarse especial dilixencia de coidado durante as tarefas de montaxe, retirada e manexo dos elementos da terraza; non se permitirá arrastralos e minimizarase o ruído que puider producirse.

8.- Non poderán afectarse bens, obras ou servizos, polo que, se resultar afectado o pavimento ou calquera outro elemento do espazo público con motivo do funcionamento da instalación, será responsable dos danos ocasionados e deberá responder da reposición dos bens ou servizos afectados.

9.- Responder polos danos ocasionados ás persoas ou ás cousas con motivo do funcionamento, instalación e retirada da terraza e durante o período en que se encontre instalada.

10.- O titular da instalación deberá ter en todo momento a disposición dos servizos técnicos e autoridades o título habilitante para o exercicio da actividade, a licenza para a terraza e renovación, no seu caso, xunto co plano detalle en que conste a superficie de ocupación autorizada, así como os xustificantes da existencia de póliza en vigor do seguro de responsabilidade civil e de aboamento das taxas municipais, e o certificado técnico de adecuación da instalación á autorización concedida, se proceder.

11.- As instalacións autorizadas deberanse retirar de forma inmediata cando iso sexa necesario para o acceso de vehículos autorizados ou de urxencias, recollida de residuos, rega ou limpeza de rúas e para a prestación de calquera outro servizo público ou de interese xeral que o requira.

12.- Unha vez finalizada a vixencia da autorización, o titular desta deberá retirar da vía pública todos os elementos da terraza, mobiliario e instalacións autorizadas; deberá quedar completamente *expedida* para o tránsito peonil a porción de espazo público. No suposto de incumprimento desta obriga, cumpriráa o concello, mediante a súa execución subsidiaria por conta do obrigado.

Artigo 29.- Taxas

Os aproveitamentos obxecto da presente normativa estarán suxeitos ao pagamento das correspondentes exaccións fiscais, de acordo coas ordenanzas que as regulan.

TITULO V.- RÉXIME DE INSPECCIÓN E PROCEDEMENTO SANCIONADOR

Artigo 30.- Inspección e réxime de actuacións

1.- A inspección e control para verificar o cumprimento da presente ordenanza correspóndelles aos funcionarios técnicos do servizo municipal ao que lle corresponde a competencia de autorización na materia.

Porén, por resolución do alcalde ou por aquelas persoas que dispoñan da preceptiva delegación de funcións, poderán tamén acreditarse funcionarios de calquera outro servizo técnico municipal que poida resultar afectado polas autorizacións reguladas na presente ordenanza, para o exercicio da función de inspección regulada neste artigo.

2.- Cando se detecte a existencia de instalacións que non contén coa preceptiva licenza ou incumpran o disposto nesta, procederá iniciar un procedemento sancionador, en cuxa resolución se lle esixirá a reposición ao seu estado orixinario da situación alternada, imporáselle ao infractor a sanción que proceda e a indemnización, se procede, polos danos e prexuízos causados.

3.- Cando, contando a instalación coa preceptiva licenza, se detecte un incumprimento das súas condicións ou das reguladas na presente ordenanza, de carácter leve e que non comporte un prexuízo grave aos intereses xerais, realizarase a advertencia ou requirimento de corrección por escrito. O incumprimento do requirido no prazo

outorgado para o efecto, ou a reincidencia no incumprimento detectado, suporá directamente a apertura do expediente sancionador polos ditos actos.

Artigo 31.- Réxime sancionador

O incumprimento das disposicións da presente ordenanza poderá dar lugar á comisión dalgunha ou varias das infraccións que se recollen nestas, en cuxo caso se tramitará un expediente sancionador para depurar a responsabilidade administrativa en que poida terse incorrido.

Artigo 32.- Suxeitos responsables

Serán responsables das infraccións as persoas físicas ou xurídicas titulares das instalacións.

Artigo 33.- Procedemento sancionador

1.- A imposición das sancións establecidas na presente ordenanza requirirá a previa incoación e instrución do procedemento correspondente, o cal se substanciará conforme o disposto na lexislación xeral sobre o procedemento administrativo común.

2.- A tramitación do pertinente procedemento sancionador levaraa a cabo o servizo que representa a competencia de autorización na materia.

3.- Durante a tramitación dos expedientes sancionadores, poderán adoptarse medidas cautelares, co contido e efectos establecidos na normativa reguladora do procedemento administrativo común.

4.- O prazo máximo para resolver e notificar a resolución do procedemento será o establecido no artigo 21 da Lei 39/2015, de 1 de outubro de procedemento administrativo común das administracións públicas. .

Artigo 34.- Órgano competente

1.- A incoación e resolución dos procedementos sancionadores corresponderalle ao órgano municipal competente para conceder a autorización correspondente.

Artigo 35.- Medidas cautelares

Cando a instalación impida ou dificulte notablemente o uso común xeral, perturbe ou supoña perigo de perturbación da seguridade e tranquilidade pública ou supoña calquera outro grave prexuízo aos intereses xerais, unha vez iniciado o procedemento sancionador correspondente, poderá acordarse a adopción de medidas cautelares tales como, entre outras, a retirada das instalacións ilegais, a suspensión da autorización administrativa para a colocación da terraza.

O concello poderá adoptar as medidas cautelares que foren necesarias para garantir o cumprimento da presente ordenanza e as esixencias dos intereses xerais, entre outros, nos seguintes supostos:

- Instalación de terraza sen autorización municipal.
- Ocupación de maior superficie da autorizada, coa finalidade de recuperar a dispoñibilidade do espazo público indebidamente ocupado para o desfrute das persoas usuarias.
- Cando, unha vez requirida a persoa titular ou representante para a recollida ou retirada da terraza se incumpra o ordenado pola autoridade municipal ou os seus axentes.

Artigo 36.- Infraccións

Constitúen infraccións as accións e omisións que contraveñan a normativa contida nesta ordenanza, así como as condicións concretas a que se suxeiten as correspondentes autorizacións.

Para os efectos do establecido no apartado anterior, terá a consideración de acto independente sancionable cada actuación separada no tempo ou no espazo que resulte contraria ao disposto nesta ordenanza.

Artigo 37.- Clasificación das infraccións

As infraccións clasifícanse en leves, graves e moi graves.

1.- Son infraccións leves:

a) O incumprimento da obriga de manter o espazo de uso público onde se empracen a terraza autorizada e cada un dos elementos que a compoñen nas debidas condicións de limpeza, seguridade e ornato, tanto durante o seu funcionamento como ao termo deste.

b) O deterioro leve dos equipamentos, infraestruturas, instalacións ou espazo de uso público que se produza como consecuencia do funcionamento da terraza.

c) A ocupación de maior superficie da autorizada cando este exceso non supere o 20%.

d) A colocación ou emprazamento da terraza en disposición diferente da autorizada.

e) A instalación de elementos de mobiliario ou auxiliares non recollidos na autorización e/ou en número maior dos autorizados, sempre que non se supere a superficie de ocupación autorizada.

f) O incumprimento de horario de inicio ou de peche en menos dunha hora.

g) A produción de ruídos durante as labores de montaxe e desmontaxe da terraza.

h) Calquera outra acción ou omisión contraria ás disposicións desta ordenanza non expresamente tipificadas como grave ou moi grave.

2. Son infraccións graves:

a) A instalación dunha terraza carecendo da autorización municipal preceptiva cando sexa posible a súa legalización.

b) A instalación de elementos de mobiliario ou auxiliares non establecidos na autorización e/ou en número maior dos autorizados, se superan a superficie autorizada.

c) A ocupación de maior superficie da autorizada en máis dun 20% e en menos do 50%.

d) O deterioro grave dos equipamentos, infraestruturas, instalacións ou espazos de uso público que se produza como consecuencia do funcionamento da terraza.

e) O incumprimento da obrigaón de retirar e recoller os elementos da terraza, unha vez finalizado o horario de funcionamento e nos termos establecidos na presente ordenanza.

f) A produción de molestias acreditadas aos veciños ou transeúntes, derivadas do funcionamento da instalación, por incumprimento das condicións establecidas.

g) A instalación de suxeicións ou ancoraxes non autorizadas.

h) A non exhibición da documentación relativa á licenza da terraza aos axentes da autoridade ou servizos técnicos competentes que o requiran.

3.-Son infraccións moi graves:

a) A instalación dunha terraza carecendo da preceptiva autorización municipal, cando esta non resulte legalizable.

b) A ocupación dunha superficie maior á autorizada en máis do 50%.

d) A produción de molestias acreditadas e graves aos veciños/as ou transeúntes derivadas do funcionamento da instalación por incumprimento reiterado e grave das condicións establecidas.

f) A desobediencia reiterada aos lexítimos requirimentos do Concello.

g) A carencia de seguro de responsabilidade civil do establecemento hostaleiro.

h) O incumprimento das condicións técnicas de instalación ou outras condicións específicas que se recollen na licenza.

i) O incumprimento da orde de suspensión ou retirada inmediata da instalación, cando diso derive: unha perturbación relevante da convivencia que afecte de maneira grave, inmediata ou directa á tranquilidade ou ao exercicio de dereitos lexítimos doutras persoas ou dificulte o uso ou o funcionamento de servizos públicos ou de interese xeral ou supoña un deterioro grave de equipamentos, infraestruturas, instalacións ou espazo de uso público.

j) A ocultación, manipulación ou falsificación dos datos ou da documentación presentada para a obtención da autorización correspondente.

k) Non desmontar as instalacións, unha vez finalizado o período de vixencia da autorización ou cando for requirido pola autoridade municipal.

Artigo 38.- Sancións

1.- As citadas infraccións serán sancionadas da seguinte forma:

a. as infraccións leves con multa de 200 ata 500 euros

b. as infraccións graves con multa de 501 ata 900 euros

c. as infraccións moi graves con multa de 901 ata 1.500 euros.

2.- A sanción é independente e compatible coa legalización da instalación, se proceder, así como coa liquidación da taxa pola ocupación non autorizada e recargos que procedan, no seu caso.

Artigo 39.- Prescrición

As infraccións leves prescriben aos seis meses, as graves aos dous anos e as moi graves aos tres anos.

As sancións impostas por infraccións leves prescriben ao ano; as sancións por infraccións graves aos dous anos; e as sancións por infraccións moi graves prescriben aos tres anos.

O cómputo do prazo de prescrición e a súa interrupción realizarase conforme o establecido na normativa reguladora do procedemento administrativo común.

Artigo 40.- Reposición da legalidade. Compatibilidade

As responsabilidades administrativas que resulten do procedemento sancionador serán compatibles coa existencia ao infractor da reposición da situación alterada ao seu estado orixinario, así como a indemnización polos danos e perdas causados.

Sen prexuízo do exercicio da potestade sancionadora e doutras potestades recoñecidas polo ordenamento xurídico, o incumprimento dos preceptos desta ordenanza poderá dar lugar á adopción das medidas que resulten procedentes co fin de restablecer a legalidade infrinxida.

Nos supostos en que o concello comprobe a instalación de terrazas sen contar coa licenza preceptiva para iso ou acorde a revogación ou suspensión da autorización por calquera das causas establecidas nesta ordenanza, requirirase o titular para que retire da vía pública os elementos da terraza no prazo de dez días hábiles, con apercibimento de que, en caso de non cumprir o ordenado, se procederá á execución forzosa, mediante execución subsidiaria por conta do obrigado.

DISPOSICIÓN FINAL

Primeira.- A presente ordenanza, que consta de corenta (40) artigos entrará en vigor o día da súa publicación no boletín oficial da provincia de Lugo e aplicarase mentres non se acorde a súa modificación ou derogación expresa.

ANEXO I

1. MOBILIARIO.- CARACTERÍSTICAS DO MOBILIARIO E ESTRUTURAS AUXILIARES

Con independencia dos requisitos individuais que se fixen para os elementos obxecto deste anexo, a combinación destes deberá ser homoxénea e estar perfectamente integrada no ambiente urbano conforme os criterios dos servizos técnicos.

A cor dos materiais de cada unha das terrazas terá que ser uniforme, de xeito que todos os elementos do mobiliario dunha mesma terraza serán da mesma cor.

2. MATERIAIS PARA OS ELEMENTOS DE MOBILIARIO (MESAS E CADEIRAS)

Para o cumprimento do requisito de integrabilidade, aceptarase o emprego de materiais tales como madeira tratada, aceiro, aluminio, ferro, plástico de deseño atractivo e de boa calidade etc. ou combinacións destes. Queda prohibido o mobiliario de plástico con escasa presenza estética, fráxil ou configuración extremadamente básica.

Todos estes elementos estarán dotados de proteccións de goma (neopreno ou similar) para evitar a xeración de rúidos no seu manexo.

3. ELEMENTOS DE SOMBRAS (TOLDOS, PARASOLES...)

- En caso de que se pretenda a autorización de toldos ou parasoles asociados á instalación de terraza, a persoa interesada deberá presentar, xunto coa solicitude, as características destes (deseño, cores, materiais, dimensións etc.) e xuntar planos de alzado e planta, así como fotografías en cor ou un catálogo dos ditos elementos, co fin de verificar o cumprimento do disposto no punto 1.

- Os toldos e parasoles serán dunha única cor, preferentemente o beige, ocre, granate, branco ou negro.

- Serán admisibles as instalacións de sombra nas formas de enrolable á fachada ou instalación illada.

- En ningún caso, estas instalacións impedirán a visibilidade de sinais de tráfico ou de información.

a) Parasoles

- Con carácter xeral, só se autorizará a colocación de parasoles facilmente desmontables e suxeitos mediante unha base de suficiente peso, de maneira que non supoña perigo para os usuarios e viandantes e que non se produza ningún deterioro do pavimento.

- Tanto o voo como o pé de apoio quedarán dentro da superficie autorizada para a terraza e deberán ter unha altura mínima de 2,20 m.

- Os parasoles serán de material téxtil ou similar, lisos e terán sempre a posibilidade de seren recollidos mediante unha fácil manobra.

b) Toldos

- Os toldos serán preferiblemente de material téxtil e terán sempre a posibilidade de seren recollidos mediante unha fácil manobra.

- A altura mínima da súa estrutura será de 2,20 m
- Os toldos serán autorizables sempre que poidan suxeitarse mediante sistemas facilmente desmontables na fachada do edificio onde se sitúa o establecemento.
- Cando o establecemento estea pechado, o toldo deberá permanecer recollido.

4. MAMPARAS, CORTAVENTOS E SOPORTES PARA TESTOS

Poderase permitir a colocación de mamparas, cortaventos e/ou xardineiras divisorias ou delimitadoras, que serán valoradas no momento en que se formule a solicitude correspondente, tendo en consideración a superficie da fachada, a anchura da beirarrúa e calquera outros criterios que permitan obter a dita valoración.

Deberán axustarse ás condicións que se especifiquen nos termos da súa autorización e, en todo caso, deberán cumprir o seguinte:

- Deberán permitir, polas súas características, a súa identificación por persoas con discapacidade visual.
- Salvo en terrazas con cerramento estable, deberán ser móbiles, para poder ser recollidas cando o establecemento estea pechado.
- Non poderán, en ningún caso, superar o ancho autorizado para a instalación correspondente.
- Deberán asegurar a súa detección a unha altura mínima de 0,15 metros medidos desde o nivel do chan.
- A altura mínima adaptarse á normativa de accesibilidade.

a) Mamparas e cortaventos

- Estes elementos empregaranse tanto para garantir o confort das persoas usuarias das terrazas como para delimitar o seu perímetro exterior.
- A súa altura cando a terraza non sexa cuberta non poderá ser superior a 1,50 m, sempre tomando como referencia a rasante do pavimento.
- As *mamparas* e cortaventos deberán presentar, en todo caso, estabilidade e rixidez suficientes e adecuarse esteticamente ao contorno en que se sitúe a instalación e, en todo caso, logo da aprobación por parte dos servizos técnicos.

b) Soportes para testos

- Empregaranse e potenciaranse non só como elemento decorativo, senón tamén como elemento elimitador e protector das instalacións de terrazas.
- A altura máxima, tanto nos elementos delimitadores como nos decorativos, non superará, incluídas as plantacións, 1,50 m.

5. TARIMAS OU PLATAFORMAS

- As tarimas nunca poderán invadir a sección libre da vía para tránsito peonil que en cada caso sexa esixible segundo os criterios establecidos e, en todo caso, deixarán libre un paso mínimo de 1,80 m na beirarrúa. Deberá, por tanto, xustificarse na solicitude a necesidade da instalación.
- Os modelos e características das tarimas deberán ser aprobados polos servizos técnicos e deberán, en calquera caso, estar realizados con materiais inifugos, antideslizantes, non oxidantes etc.
- Deberán estar dotadas de elementos de protección perimetrais.
- Igualmente, presentará seguro de responsabilidade civil no cal se inclúa este elemento.

6. SISTEMAS DE CLIMATIZACIÓN E CALEFACCIÓN. INSTALACIÓNS ELÉCTRICAS

Nas terrazas poderanse instalar estufas ou quentadores, elementos de iluminación etc., de baixo consumo e sen que supoñan emisión de ruídos.

Con carácter xeral, non se admiten instalacións fixas; deberanse retirar conforme o horario autorizado.

- En todo caso, calquera instalación destas características deberá ser expresamente sometida a autorización e deberase presentar, ademais, a documentación específica (características técnicas, planos específicos, certificados de homologación, xustificación normativa vixente etc.).

No suposto da renovación da autorización, a declaración a que se refire o art. 24.2.a), deberá, ademais, conter referencia ás adaptacións destas instalacións á normativa vixente no momento da renovación.

- As instalacións serán executadas por un instalador autorizado. A revisión da instalación realizarase conforme a normativa de aplicación; o concello poderá requirir a documentación acreditativa en calquera momento.

- Todos os elementos deberán estar homologados conforme a normativa vixente que lles sexa de aplicación e, en particular, para o seu uso en exteriores.

- No caso de que se solicite autorización para colocar elementos de iluminación, estes non poderán, en ningún caso, orixinarlles deslumbramento nin outras molestias aos veciños/as, viandantes nin vehículos.

RECURSOS: Contra esta ordenanza pódese interpoñer directamente recurso contencioso-administrativo, diante do Xulgado do Contencios-Administrativo de Lugo, no prazo de dous meses, contados a partir do día seguinte á publicación no Boletín Oficial da Provincia, de conformidade co previsto no art. 112.3 da Lei 39/2015, de 1 de outubro, do Procedemento Administrativo Común das Administracións Públicas.

Castro de Rei, 31 de maio de 2018.- O Alcalde, Francisco Javier Balado Teijeiro.

R. 1714

CASTROVERDE

Anuncio

Pola Xunta de Goberno Local, en sesión celebrada o 6 de xuño de 2018 prestouse aprobación ao Padrón do prezo público pola prestación do servizo de axuda no fogar correspondente ao mes de maio de 2018, e expónse ao público polo prazo de quince días contados a partir do seguinte da súa publicación ao obxecto de que poida ser examinado e presentar contra o mesmo as reclamacións que se estimen pertinentes. Así mesmo faise saber que dita publicación servirá de notificación colectiva a todos os contribuíntes nel comprendidos ao amparo da Lei Xeral Tributaria.

Castroverde, a 12 de xuño de 2018.- Xosé M^a Arias Fernández.

R. 1687

CERVO

Anuncio

APERTURA DA BOLSA DE EMPREGO DO CONCELLO DE CERVO PARA POSTOS DE TRABALLO DE AUXILIAR DE AXUDA NO FOGAR

De conformidade co decreto de Alcaldía número 561 de 12 de xuño de 2018, faise a convocatoria para a apertura da bolsa de emprego do Concello de Cervo para postos de traballo de auxiliar de axuda no fogar.

A convocatoria e as bases aprobadas están a disposición dos interesados no Rexistro Xeral do Concello de Cervo e na súa páxina web (www.concellodecervo.com).

O prazo de presentación de solicitudes será de 5 días naturais a partir da publicación do anuncio no Boletín Oficial da Provincia de Lugo.

Cervo, 13 de xuño de 2018.- O alcalde, Alfonso Villares Bermúdez.

R. 1715

FRIOL

Anuncio

CONVOCATORIA PARA A ELECCIÓN DE XUIZ DE PAZ TITULAR E SUSTITUTO DO CONCELLO DE FRIOL.

De conformidade co acordo adoptado pola Sala de Goberno do Tribunal Superior de Xustiza de Galicia, de data 1 de xuño de 2018, e á vista do vencemento do período de 4 anos de nomeamento do Xuíz de Paz titular e Sustituto do Concello de Friol, faise pública a convocatoria para a elección de Xuíz de Paz do Concello de Friol, titular e sustituto, que serán elixidos polo Pleno do Concello.

Requisitos dos aspirantes:

Ser español, maior de idade e aínda non sendo licenciados en dereito, reúna os requisitos establecidos na Lei Orgánica do Poder Xudicial para o ingreso na carreira xudicial e non estean incurso en ningunha das causas de incapacidade ou incompatibilidade previstas no desenvolvemento das funcións xudiciais, a excepción do exercicio de actividades profesionais ou mercantís.